

Tarnimikkut nappaatilinnik nammineersinnaajunnaarsitsinermit allatigullu pinngitsaaliissummik iliuuseqarnermut atatillugit ilisimatitsineq maalaaruteqarsinnaanermillu ilitersuineq pillugit Namminersorlutik Oqartussat nalunaarutaat nr. 16, 2. december 2013-imeersoq

Tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuuseqarneq pillugu Inatsisartut inatsisaanni nr. 24-mi, 3. december 2012-imeersumi § 40 naapertorlugu aalajangersarneqarput:

Kapitali 1

Ilisimatitsineq

Pinngitsaaliissummik unitsitsineq tiggummigallagassanngortitsinerlu

§ 1. Nakorsap unitsitsisup tarnimikkut nappaatilinnik nammineersinnaajunnaarsitsineq allatigullu pinngitsaaliissummik iliuuseqarneq pillugu Inatsisartut inatsisaanni § 6, imm. 2, naapertorlugu pinngitsaaliissummik unitsitsinissaq pisariaqartut nalileruniuk, napparsimasoq tamatumingga ilisimatissavaa.

Imm. 2. Nakorsaq unitsitsisoq tamatuma malitsigisaanik §§ 3 aamma 38 naapertorlugit pinngitsaaliissummik unitsitsinermit tunngavisoq siunertaasorlu pillugit napparsimasoq ilisimatissavaa, peqqissinerusinnaaneralu pillugu paasitillugu. Immikkoortortami uninnngaviusussami nakorsaq taamatuttaaq pisussaaffeqarpoq.

§ 2. Angerlartitaanissaq noqqaassutaappat, Dronning Ingridip Napparsimmavissuani tarnimikkut nappaatilinnut immikkoortortaqaarfimmi nakorsaanerup, piaarnerpaamik kingusinnerpaamillu nal. ak. 24-t qaangiutsinnagit napparsimasoq angerlarsinnaanersoq imal. pinngitsaaliissummik tiggummineqarallanersoq nalunaarfigissavaa. Pinngitsaaliissummilli unitsitaanermit nal. ak. 24-t iluanni angerlartitaanissaq noqqaassutaappat, nakorsaanerup aalajangiinera pinngitsaaliissummik unitsitsinermit nal. ak. 48-t qaangiutsinnagit nalunaarutigineqassaaq.

§ 3. Pinngitsaaliissummik tiggummigallarneqarnissaq nakorsaanerup aalajangerpagu, ilisimatitsineq taama aalajangernermut tunngaviusumik, tassani siunertamik peqqissinerusinnaanerlu pillugit paasissutissanik imaqaassaaq.

§ 4. Nakorsaanerup Inatsisartut inatsisaanni § 31, imm. 2, naapertorlugu nammineersinnaajunnaarsitsinermit naliliinermit atatillugu, nammineersinnaajunnaarsitsinerup

attatiinnarneqarnissaa aalajangiuppagu, napparsimasoq siunnersortaalu aalajangiineq pillugu ilisimatinneqassapput.

§ 5. Inatsimmi § 5 naapertorlugu nammineersinnaajunnaarsitsinermi piumasaqaatit eqquutsinneqarsinnaajunnaarpata, nammineersinnaajunnaarsitsineq ingerlaannaq atorunnaarsinneqassaq. Napparsimasoq siunnersortaalu Inatsisartut Inatsisaanni § 11 naapertorlugu ingerlaannaq tamatuminnga ilisimatinneqassapput.

Pinngitsaaliissummik nakorsarneqarnissaq,

aalaakkiineq il.il.

§ 6. Inatsisartut inatsisaanni kapitali 4-mi aalajangersakkat naapertorlugit pinngitsaaliissummik nakorsarneqarnissaq, pinngitsaaliissummik aalaakkerneqarnissaq, timikkut pinngitsaaliinermik atuineq, napparsimasoq illersorniarlugu aalaakkiineq, napparsimasumik immikkut nakkutilliineq, immikkoortortami matunik parnaarsineq, Inatsisartullu inatsisaanni § 27 naapertorlugu pinngitsaaliinikkut timikkut eqqiluisaartitsineq, kiisalu Inatsisartut inatsisaanni § 29 naapertorlugu napparsimasup allagarsiaanik/ nassiussarsiaanik, napparsimmavimmi inimik uninngavigisaanik, pigisaanik, timaalu satsillugu misissuineq pisariaqarsorinarpata , napparsimasoq tamatuminnga ilisimatinneqassaaq.

Imm. 2. Ilisimatitsissut pinngitsaaliissutaaniartup suunera pillugu paasissutissanik, pinngitsaaliiniarnermullu tunngaviumik siunertaasumillu imaqassaaq. Pinngitsaaliissummik nakorsarneqarnermut atatillugu peqqissinerusinnaaneq, nakorsarneqarnerup sunniutai kingunerluutaasinnaasullu pillugit napparsimasoq aamma ilisimatinneqassaaq.

§ 7. § 6 naapertorlugu piaarnerpaamik pinngitsaaliissummillu iliuuseqartoqartinnagu ilisimatitsisoqassaaq.

Imm. 2. Inatsisartut inatsisaanni §§ 19-22 naapertorlugit pinngitsaaliilluni aalaakkiinermi imal. nukersorfiginninnermi pingaartumik pinasuartariaqarnermi ajoqusertoqarnissaalu aarlerinaateqarpat, pinngitsaaliisariaqarnermik ilisimatitseqqaarani iliuuseqartoqarsinnaavoq. Taama pisoqarpat napparsimasoq pinngitsaaliissummik iliuuseqarnerup kingorna pinngitsaaliinermut tungavilersuutaasoq siunertaasorlu pillugit piaarnerpaamik ilisimatinneqassaaq.

Ilisimatitseriaaseq

§ 8. Oqaatsitigut allakkatigullu ilisimatitsisoqassaaq. Taamaattorli § 1, imm. 1, naapertorlugu ilisimatitsinissami oqaatsit kisimik atorneqassapput.

Kapitali 2

Maalaaruteqarnissamut ilitsersuineq

Malittarisassat nalinginnaasut

§ 9. Pinngitsaaliisummik iliuuseqarnerni tamatigut napparsimasoq pineqarnini pillugu maalaaruteqarsinnaanerani, kiisalu maalaarutip Inatsisartut inatsisaanni § 39, imm. 2 aamma 3 naapertorlugit iliuuseriniakkamik kinguartitsinermik kinguneqarsinnaanerani ilisimatinneqassaaq.

§ 10. Pinngitsaaliisummik iliuuseqarfigineqarnissaq pillugu ilisimatinneqarnermut atatillugu, napparsimasoq maalaaruteqarsinnaaneq pillugu ilitsersorneqassaaq.

Imm. 2. Pinngitsaaliisummik nakorsarneqarnissaq pillugu maalaarut, Inatsisartut inatsisaanni § 39, imm. 3, naapertorlugit kinguartitsinermik kinguneqarpat, piaarnerpaamik pinngitsaaliisummillu nakorsarneqarneq aallarnerneqartinnagu maalaaruteqarsinnaanermik ilitsersuisoqassaaq.

Ilitsersuutip imarisai

§ 11. Pinngitsaaliisummik napparsimavimmut unitsitsinermi, pinngitsaaliisummik tigummigallagassanngortitsinermi, takkutinnngitsoortunik/utinngitsoortunik pinngitsaaliisummik utertitsinermi, pinngitsaaliisummik nakorsaanermi, napparsimavimmiit angerlareernermi pinngitsaaliisummik malittarinninnermi, pinngitsaaliisummik aalaakkiinermi, nukersorfiginninnermi, napparsimasoq illersorniarlugu aalaakkiinermi, ataavartumik nal. ak. 24-t sinnerlugit sivisussusilimmik immikkut nakkutilliinermi, kiisalu immikkoortortami parnaarsinermi, napparsimasoq Tarnimikkut Nappaatillit Maalaarutaannik Aalajangiisartunut, pinngitsaaliisummik iliuuseqarfigineqarneq pillugu maalaaruteqarsinnaanerani ilitsersorneqassaaq. Napparsimasup siunnersortaataluunniit, Inatsisartut inatsisaanni § 42 naapertorlugit piumasaqaatigippagu, maalaarut Tarnimikkut Nappaatillit Maalaarutaannik Aalajangiisartunut suliassanngortinneqassasoq, napparsimasoq aamma ilitsersorneqassaaq.

Imm. 2. Taamatuttaaq napparsimasoq tamatuminna kissaateqarpat, Tarnimikkut Nappaatillit Maalaarutaannik Aalajangiisartunut maalaaruteqartarneq pillugu, napparsimasup napparsimasullu siunnersortaata, oqaatsit atorlugit imal. qarasaasiakkut attaveqaqatigiinnikkut Aalajangiisartunut saqqummiussisinnaanerani, kiisalu § 43 naapertorlugit Aalajangiisartut aalajangiinissaannut piffissaliussaq ilanngullugu, ilitsersuutigineqassapput.

Ilitsersueriaaseq

§ 12. Malaaruteqarsinnaaneq oqaatsit atorlugit ilitsersuutigineqassaaq. Napparsimasup piumasaqaatigippagu maalaaruteqarnissamut ilitsersuut allaganngorluguttaq tunniunneqassaaq.

Atuutilersitsineq

§ 13. Nalunaarut atuutilersinneqarpoq 16. december 2013.

Namminersorlutik Oqartussat, ulloq 2. december 2013

Steen Lyngø

/

Ann Birkekær Kjeldsen